

東修園醫書五十種
二

R2-51

34-4

醫學三字經小引

童子入學塾師先授以三字經欲其便誦也識途也學醫之始未定先授何書如大海茫茫錯認半字羅經便入牛鬼蛇神之域余所以有三字經之刻也前曾託名葉天士取時俗所推崇者以投時好然書中之奧旨悉本聖經經明而專家之技可廢謝退谷於註韓書室得繕本惠書千餘言屬歸本名幸有同志今付梓而從其說而仍名經而不以爲僭者採集經文還之先聖海內

諸君子可因此一字而共知所遵且可因此一字而不
病余之作

嘉慶九年歲次甲子人日陳念祖自題於南雅堂

凡例

一是書前曾託名葉天士。今特收回。

一是書論證治法。悉遵古訓。絕無臆說浮談。以時法列於前。仲師法列於後。由淺入深之意也。

一坊刻萬病回春。嵩厓尊生。古今醫統。東醫寶鑑等書。所列病證。不可謂不詳。而臨時查對。絕少符合。卽有合處。亦不應驗。蓋以逐末而忘其本也。試觀內經。難經。傷寒論。金匱要略。每證只寥寥數語。何所不包。可知立言貴得其要也。此書如怔忡頭痛。歷節諸證。非

遺之也。怔忡求之虛癆。頭痛有邪。求之傷寒。無邪求之眩暈。虛癆歷節。尋其屬風。屬溼。屬虛。而治之。所以寓活法也。

一學醫。始基在於入門。入門正。則始終皆正。入門錯。則始終皆錯。是書闡明聖法。爲入門之準。不在詳備。若得其祕訣。未嘗不詳備也。有證見於此。而治詳於彼者。有論此證。而彼證合而並論者。有論彼證。絕未明言此證。而卽爲此證之金鍼者。實無他訣。惟其熟而已。熟則生巧。自有左右逢原之妙。

一論中所列諸方。第三卷第四卷俱載弗遺。惟傷寒論金匱要略方。非熟讀原文。不能領會。此書偶有闕而未載者。欲人於原文中尋其妙義。闕之卽所以引之也。閱者鑒予之苦心焉。

一方後附論。或採前言。或錄一得。視諸書較見簡括。閱者自知。

醫字

經學

貳

醫學三字經目錄

卷一

源流

咳嗽

心痛

隔食

血症

卷二

蠱脹

中風

瘧疾

腹痛

反胃

水腫

暑症

虛癆

痢疾

胸痺

氣喘

脹滿

泄瀉

眩暈

狂

癰閉

疝氣

傷寒

小兒

卷三

藥方

卷四

嘔吐

逆噦
呃

癰

渴病

痰飲

瘟疫

癰

五淋

遺精

消渴

婦人

藥方

附錄

陰陽

識一字便可爲醫說

臟腑

十二官

心說

肝說

脾說

肺說

腎說

胃說

膽說

大腸小腸說

三焦說

手心主說

膀胱說

命門說

經絡

四診

望色

聞聲

問證

切脈

運氣

張飛疇運氣不足憑說

醫學三字經卷一

閩吳航陳念祖修園著

醫學源流第一

醫之始。

本岐黃。

黃黃帝也。岐岐伯也。君臣問答。以明經絡藏府運氣治療之原。所以爲醫之祖。雖神農本經在黃帝之前。而神明用藥之理。仍始於內經也。

靈樞作。

素問詳。

靈樞九卷。素問九卷。通謂之內經。漢書藝文志載黃帝內經十八篇是也。醫門此書。卽業儒之五經也。

難經出。

更洋洋。

洋洋盛大也。難經八十一章。多闡發內經之旨。以補內經所未言。卽間有與內經不合者。其時去古未遠。別有考據也。秦越人號扁鵲。戰國人也。著難經。

越漢季。

有南陽。

張機字仲景。居南陽官長沙漢人也。著傷寒雜病論。金匱玉函經。

六經辨。

聖道彰。

內經詳於鍼灸。至伊尹有湯液治病之法。扁鵲倉公因之。仲師出而雜病傷寒。崑以方藥爲治。其方俱原本於神農黃帝相傳之經方。而集其大成。

傷寒著。

金匱藏。

王肯堂謂傷寒論義理如神龍出沒。首尾相顧。鱗甲森然。金匱玉函示寶貴祕藏之意也。其方非南陽所自造。乃上古聖人相傳之方。所謂經方是也。其藥悉本於神農本經。非此方不能治此病。非此藥不能成此方。所投必效。如桴鼓之相應。

垂方法。

立津梁。

仲師醫中之聖人也。儒者不能舍至聖之書而求道。醫者豈能外仲師之書以治療。

李唐後

有千金

唐孫思邈。華原人。隱居太白山。著千金方。千金翼方。各三十卷。宋仁宗命高保衡林億校正。後列禁經二卷。今本分爲九十三卷。較金匱雖有浮泛偏雜之處。而用意之奇。用藥之巧。亦自成一派。

外臺繼

重醫林

唐王燾著外臺祕要四十卷。分一千一百零四門。論宗巢氏。方多祕傳。爲醫門之類書。

後作者

漸浸淫

等而下之。不足觀也已。

紅紫色

鄭衛音

間色亂正。廢音忘倦。

追東垣。

重脾胃。

金李杲。字明之。號東垣老人。生於世宗大定二十年。金亡入元十七年終。年七十二。舊本亦題元人作脾胃論。辨惑論。蘭室秘藏。後人附以諸家合刻。有東垣十書傳世。

溫燥行。

升清氣。

如補中益氣。及升陽散火之法。如蒼朮白朮。羌活獨活。木香陳皮葛根之類。最喜用之。

雖未醇。

亦足貴。

人謂東垣用藥。如韓信將兵。多多益善。然駁雜之處。不可不知。惟以脾胃爲重。故亦可取。

若河間。

專主火。

金劉完素。字守真。河間人。事蹟俱詳金史。方技傳。主火之說。始自河間。

遵之經。

斷自我。

原病式十九條俱本內經至真要大論多以火立論而不能參透經旨如火之平氣曰升明火之太過曰赫曦火之不及曰伏明其虛實之辨若冰炭之反也

一二方

奇而妥

如六一散防風通聖散之類皆奇而不離於正也

丹溪出

罕與儔

元朱震亨字彥修號丹溪金華人其立方視諸家頗高一格

陰宜補

陽勿浮

丹溪心法以補陰為主謂陽常有餘陰常不足諸家俱辨其非以人得天地之氣以生有生之氣即是陽氣精血皆其化生也

雜病法

四字求

謂氣血痰鬱是也一切雜病只以此四字求之氣用四君子湯

血用四物湯。痰用一陳湯。鬱用越鞠丸。參差互用。各盡其妙。

若子和。

主攻破。

張子和戴人書中所用。多大黃芒硝牽牛芫花大戟。甘遂之類。意在驅邪。邪去則正安。不可畏攻而養病。

中病良。

勿太過。

子和之法。實證自不可廢。然亦宜中病而即止。若太過則元氣隨邪氣而俱散。挽無及矣。

四大家。

聲名噪。

劉河間。張子和。李東垣。朱丹溪。爲金元四大家。張氏醫通之考核不誤。

必讀書。

錯名號。

李士材醫宗必讀四大家論。以張爲張仲景。誤也。仲景爲醫中之聖。三子豈可與之並論。